



列聖御製
三

純祖朝

廿五

~ 16
2312
25



和
2312
卷40-25

列聖御製目錄

卷之八十

純宗大王文

卷之八十一

純宗大王文





列聖御製卷之八十

純宗大王

文

孝安殿進香文 乙丑

嗚呼不肖小子誠孝淺薄歲在庚申遽遭 崩天
 之痛攀號隕絕震剝皇皇之中其所賴而為生者
 惟我 慈聖自是以來夙宵所瞻依仰戴者惟我
 慈聖而豈意蒼穹不吊 仙馭上賓又遺小子罔
 極之痛耶嗚呼 慈聖惟天篤生己卯之歲惟我
 英考載行舟梁之禮德如太姒六宮皆頌八域咸

仰粵在乙丙羣兇肆逆敢沮 代理迺者 聖后
資定大策 宗社由是而永固嗚呼庚申之夏維
天降割舉朝雨泣國勢岌岌小子之年纔過十歲
叨承艱大之業賴我 聖母訓誨之恩惟政惟事
罔敢或怠謹遵 貞熹聖母之事乃垂簾帷闡明
大義一政令一施措必詢之公卿而行之兢兢翼
翼以勵臣工邪術滔天倫綱幾斁大行天討使我
東之民咸入于正道勤勤孜孜一念憂民道臣守
宰之辭陞必以保民恤民諄諄 下教平糶糴而
減進供嘗曰此不足助國用於民必有所益又自

庚申之後保小子靡不用極凡寒暑風雨之時必
勿使小子問候曰予之所處非曰遠也予之憧憧
惟在保護又於 孝元殿親奠若值風雪雨露則
亦勿使往 辭教懇惻小子欲盡述何可勝書小
子之患水痘紅疹必嘗來臨自忘 王體之勞小
子賴 慈德而疾愈者屢矣癸亥冬法殿告災惟
我 聖母克盡修省之方董飭有司期於重建此
亦為小子堂構之 聖衷也撤簾之後小子凡有
大事則必以稟請今則廓然靡所憑依嗚呼痛其
曷極今年 寶甲慈德謙挹而為小子勉從賀儀

纔舉 徽號未進禍變遽至於斯前日進號稱賀
 之殿今日為哀號哭泣之所嗚呼痛哉嗚呼痛哉
 居廬纔數十日小子患痘不日而復此莫非寔賴
 宗社之默佑 陟降之陰隲追念前日痘疹 臨
 察之時愴痛之懷又何以堪抑 元陵左岡龜筮
 協吉象設既同月遊無隔是可以有慰於神理人
 情啓劄只餘數旬今又謹書上於 梓宮俯仰穹
 壤靡所逮及痛哭獻爵 陟降如臨庶幾 俯鑑
 微誠而垂歆焉嗚呼痛哉嗚呼痛哉

健元陵親祭文 丁卯

清晨駕發 兩陵祗謁感慕采深周旋恍惚久未
 展誠其年也四祗薦泐酌小子誠至

元陵親祭文

三霜已畢四來展誠 仙寢密邇天氣和清感慕
 之極愈往愈深有淚如瀉不覺霑襟

六陵攝行祭文

兩陵展拜松楸密邇情無間焉理或俯只

朴忠獻公 準源 致祭文

維嘉慶十二年歲次丁卯二月癸酉朔初十日壬
 午外祖贈議政府領議政行判敦寧府事贈謚忠

獻朴公之訃至予率百官舉哀闕庭擬成服日臨
哭于公之靈筵而未能命有司設饌外孫國王親
綴文字替奠而告之曰潘南其裔赫赫名家忠厚
相傳與人歎嗟猗歲丁未公為國戚小心翼翼壹
是惕惕先王曰嘉惟乃之誠恩試寢郎公居若
驚東銓承命南邑遷轉盡瘁事國隨處而見粵
在英考屢獲侍焉兩朝被遇聲名采傳小子
誕降庚戌之年公之勞動功大無邊禁直其久保
護之餘承候之暇猶不廢書月久年易公心則一
如玉君子謂公之質小子年長賴公之力祖孫之

間師弟之則嗚呼公功不盡不極十八年教其教
也直學問之勉公是功也予之成就非公何者忍
言庚申崩圻之慟遑遑焦灼含哀茹痛公亦飲泣
左右扶將勉我曰抑寬我哀遑貞純聖母嘉公
之忠授將任職扈衛九重國之安保賴公之功寡
躬逮今非公功誰偶然慎節何故留遲近間頗減
願言快復豈意世事如是反覆公胡長逝貽哀三
叔慈宮哀慟此何景狀悲恨纏曾掩抑不忘昨
臘一面永訣千古嗚呼痛哉曷其復苦贈以上相
豈足云酬加之美謚庶揚其休遣官替酌痛哉公

靈痛哉公靈歆格苾馨

孝安殿禫祭親祭文

日月易邁三霜已畢俯仰穹壤靡逮如失吉祥變
易惟禮之禫祗薦泂酌小子孝感

孝安殿望祭親祭文

禫祀已過望祭其至銜恤靡逮小子誠意

孝安殿朔祭兼告動 駕祭親祭文

祔 廟時近 靈駕將戒祗告事由小子其拜

文禧廟酌獻禮祭文

仁孝其德溫文其姿未逮承顏孔懷我思壬年之

慶溢于八方甲辰儲位磐泰 宗祊 先王歡悅

殿宮祝祐臣民不吊嗚呼丙午嗣服之後不遑躬
來齋意未遂耿耿懷哉八年之闕四月其謁幽明
豈隔若觀音容周旋恍惚同氣之情一宮之內未
能進拜咫尺之地瞻望興喟替斟其酌遣官致祭
二南其化極盡小嘽具告事由展拜之夕昭薦苾
馨庶幾歆格

宜嬪廟遣內侍致祭文

小星其職德冠後宮 先王曰嘉克追周風嗣服
之後感于心衷諸宮展謁今日其同甲辰邦慶壬

寅之功 文禧廟拜其親也兄敬薦缺 酌酌獻禮
成未能進拜咫尺之地遣官替酌庶幾歆止

朴忠獻公準源 致祭文

嗚呼公之捐館忽為三月之易日之將卜遂作萬
年之訣執紼一慟在情即然於國禮之無有覺予
淚之盈襟盛儀像生耀公德之至仁佳城入望悲
我叔之孝心即惟夫人系出名閥之中兼有溫淑
之質曰賢曰哲早則閨範之禮宜室宜家誕我
慈宮之祥幾歲離別倏焉同原吉運未及姑未同
穴之藏咫尺安葬庶幾神理之豫嗚呼予心曷有

其極公子公孫予當愍恤之不暇歆格歆饗庶鑑
寡人之誠至

朴忠獻公準源 致祭文

日月雖易愴慕予心合慶庭試春臺親臨乙科登
第公之冢孫榮動萬人慶溢一門嗚呼嗟哉公胡
未見遣官替告攸司備奠

健陵親祭文

昨春展謁今秋親享霜露既降草木其長望日修
改工役即訖永奠完固莎草茂苑小子未瞻感慕
愈新 顯園次拜情無間親日朗氣清周旋出入

祇薦芬苾靡所逮及

顯隆園親祭文

肅肅 顯園祇拜者三松楸鬱然西東北南 先
王來謁歲每再焉小子躬享怵惕周旋 陟降若
臨庶羞既陳 健陵先省微誠復伸

華寧殿酌獻禮祭文

有儼 華寧行宮之東 八彩睟容敬奉殿中
陵園瞻拜其日也昨小子誠至祇陳洞酌

孝昌墓親祭文

嚮拜于 廟今謁于 墓雨露既濡葱鬱松樹日

吉辰良拜 陵回鑾永言追感 廟墓一般初省

於此瞻望靡及 靈其歆格庶慰於悒

卒判書朴宗輔致祭文

嗚呼維卿曰子渭陽自戚聯初侍我 先王左右
朝夕服勤無方 先王曰嘉嘉乃端良庚戌子誕
其泣嗶嗶卿任保護奉以璋裳學語問字跪拜趨
翔衣服飲食起居溫涼罔不周旋洞屬靡遑嗚呼
庚夏天地茫茫子藐瑩瑩人心沸湯維我忠獻柱
石棟樑至于今日國其安康昨春變恠出三事行
誣逼 四朝數敗倫常卿乃飲泣奮身擔當父子

兄弟入告出揚聞我大義振我天綱恩報先朝
功在宗祊維卿起蔭內外歷敷銀臺亞卿兩佩
銅章遂長度支名績益彰仲春之慟欲說摧腸遂
阻卿面我思每長周也登第簪筆在傍雖聞卿病
所恃堅剛豈意今日奄忽云亡慈懷莫慰予悲
何量誠忠之言豈弟容光何由復見俾也可忘綴
辭抒情有淚盈眶不沫者存歆我豆觴

朴忠獻公

準源

致祭文

戊辰

嗚呼小子之平日依賴者公也公之嘗輔導教誨
者小子也公與小子之間豈尋常祖孫而比之哉

言行道德小子之欽服也經學文章小子之願學
也十八春秋如是而過其間公之至誠苦心小子
雖欲能盡記其可得乎略言常所感慕之懷以伸
小子悲愴之情嗚呼公之自庚戌禁直之後凡一
事一行未敢自專在於直所席不盈坐衣僅蔽體
侍於御座鞠躬如也蹴踏如也此公之恭儉也
兼受師保之任身未嘗出外而小子之課讀自三
經四書以至歷代史記盡心教之稍有通知未達
者必開釋反復使小子覺知而後乃止已達者必
溫繹習熟使小子不忘而後乃止此公之誠勤也

及夫祁寒盛暑勿使小子觸冒勞身曰此非慎疾之道恐貽 殿宮之憂屢次疹痘晝夜勤勞躬執藥餌思人未及思者行人未及行者此可為公之功德末節而謙謹以為主誠敬以為本豈非公之第一盛行乎每於靜思嗟唏未逮自今以後雖欲見前日之事其可得乎嗚呼慟哉公之初祥奄隔一宵歲月之迅速自古然矣前年今日恍然如昨仰觀 慈宮之哀毀次思諸叔之罔極小子之悲懷言之何益茲遣承宣替奠予酌至情無文理之然也惟舉萬一之辭以告公靈之前靈其歆格嗚

呼慟哉

永陵親祭文

星言夙駕奕奕 仙寢小子嗣服今始拜審象設孔邇 陟降洋洋心切松楸感寓露霜羹墻之思何日無然敢進泂酌在陳豆籩

昭寧園親祭文

有儼 園寢神明在上宏功大德何時可忘篤生聖人不我東國 英考之孝繼志述則初來展誠微情益切霜露履序松楸鬱列感慕采新周旋恍惚祗薦苾馨小子拜謁

洪奉朝賀 鳳漢 墓致祭文

嗚呼翼靖 慈宮所怙位躋將相才兼文武 兩
朝倚重肺腑弼輔昔我 寧考曰若外祖功於予
躬保護辛苦 先王至明公家多祜至于辛酉風
波亦數昨春之事如疾今愈輦路興感瞻彼封樹
遣官致侑靈其無吐

洪奉朝賀 鳳漢 致祭文

嗚呼惟公即誕育我 慈宮配體 貳尊而誕育
我 先王而又有小子 慈宮 先王之母小子
先王之子也小子嘗昔日承聞 先王之訓若曰

公歷險履變飽平生之辛酸結千古之幽鬱予嘗
隱痛而重惻者也 王音丁寧如在乎耳邊嗚呼
公以當世之大才受 英廟之知遇裨益大猷協
升景業其處則肺腑之親也其責則股肱之重也
擔當國務不外於經綸地部惠局澤流於京鄉位
居三台足遍五營名績茂且著矣至于翊護 先
王閱歷危險者多 先王嘗有仰奏 慈宮之辭
而予小子雖不敏亦已熟聞矣奈之何風波累出
於暮景塵劫多端於桑榆古人所云利于西南往
得中也不利東北其道窮焉乘馬班如泣血漣如

人人之常情也而嗚呼公則却世事險艱之憂卧
文峯寂寞之野及公之倏焉升化 先王悲愴極
盡生死之榮 星駕西出每致泃酌之禮噫我
聖心非但報公之殊功亦出慰悅我 慈心興言
及此不覺感慕予嘗觀 先王祭公之文若曰
萱暉不老 寶壽添屋蚤暮祈祝南山北極也祝
慈齡之萬年頌 寶籙於無疆者此蓋 聖心之
洞洞自洋溢乎辭表之間嗚呼小子誠淺孝薄雖
有千乘之富未遂千乘之養惟有安心樂志竊冀
慈心之怡悅而誠不能及於 先王孝亦不能及

於 先王不幸兇徒放恣先以嘗試之計敢呈至
凶之疏其事則不忍不敢也其言則至慚至慝也
以 先朝所不敢提者敢提於今日以 先朝所
不敢道者敢道於今日言之驚心思之痛惋况
先朝丙申初有以 英廟下教昭晰者予小子今
日所繼述者 先王之志事也予小子今日所固
守者 先王之精微也有何加減於其間而痛矣
凶徒之甘心背馳者抑獨何故 慈宮何不以憤
痛予心何不以切迫王章已加輿憤少洩當此慰
悅 慈宮之時豈無示意於公促入嗣孫頻頻承

及聖御集卷之八
候茲遣近侍致侑於祠宇嗚呼公靈庶幾有知來
垂歆格

光恩副尉金箕性成服日致祭文 辛未

嗚呼惟尉生而鍾靈秀之氣行而存治家之業自
在髫齡令望夙彰 英廟之所揀選 寧考之所
倚重 慈宮之所眷愛寡人之所禮敬每卿常時
戚戚懷憂恒念榮寵之戒兢兢惡盈深惕溢滿之
懼兩子立朝小心恭謹一則卿月一則高蔭粵我
英考簡在 聖心椒房沁園華垂金玉之光歷事
兩朝務極當位之任不以儀賓之親未嘗數數私

覲雖於私覲之日進退遲速盡其規矩出入升降
合中節度即予平日之熟觀者也嗚呼世事難料
尉忽添疾而猝逝豈勝惆悵曷言痛慘致侑慰之
國典常事茲遣內侍洞酌設奠尚垂來格

顯陵 崇陵 懿陵 元陵攝行祭文

初則定謁有因不行茲遣大臣敬替洞酌

洪奉朝賀 鳳漢 致祭文 壬申

嗚呼惟卿肺腑至親昔在 英廟輔弼有人及于
寧考以親以尊實記遺集 璿製宛存中間滄桑
實為天命到今昭晰亦理之炳生死無間屈伸來

往 慈齡八耄喜懼日積安第其顧舊容寂寂國
家待卿烏可如斯今命侍從謹傳一卮爰飭祀孫
舊第來享神靈有知尚冀歆饗

贈領議政洪仁謨致祭文

嗟卿云亡上相例地言念都尉其心如之侂侂恩
曠靈應有知其來受之我意尤至

光恩副尉金箕性致祭文

卿之云逝倏過周天懿躅寂寞不禁愴然曷以示
懷節惠是宣綴辭侂侂清酌潔籩

宜嬪回甲日致祭文

癸酉

於乎是宮吉慶攸宜嬪德克淑 聖褒曾垂忍說
維丙并享令辰回甲生朝適丁斯年志切寓感禮
合薦酌侂官替奠庶幾歆格

惠慶宮進香文

丙子

嗚呼猗我 慈德思齊任姒克配 闕宮如地配
天篤生我 寧考誕受二紀千乘之養保護小子
于今二十六年而克享曾孫之慶矣卓越之德千
萬古后妃之所不及莫大之功四百年 宗社之
所永賴此非小子之言乃一國之言欲報功德何
以盡形容乎乙卯奉壽之筵 寧考之至極聖孝

也已已表饌之禮小子之繼述微忱也恍如昨日
悲慕曷追嗚呼 寶齡躋於九九小子只祝萬年
之長奉豈意皇穹不吊一時无妄之患遽致罔極
之痛乎來景春而 慈顏莫承入歡慶而 慈音
莫聞小子追思撫愛之 慈恩又慕 寧考之大
孝新舊悲痛天地悠悠臨文以寫益不勝愴咽之
至時月流邁仲春奄及撫時靡逮含哀茹痛謹遵
故禮兼薦徽誠書不盡述有慟無窮伏惟俯垂歆
格嗚呼哀哉

卒判書朴宗慶成服日致祭文

丁丑

維忠獻公洞洞翼翼在國功大於家慶積爰及伯
胤為予柱石理不可諶天奪之速維卿才器繼父
兄績委以國事心膂是托十六年間位躋輔國歷
遍九卿乃長館閣左領簿書右綰金轂周旋奔轅
夙夜殫竭維昔清城赫赫可匹非予私卿卿自特
達云胡无妄遂成大訣若夢非真錯愕恍惚卿忍
舍予半途而畢視卿手足今焉如失倚卿干城今
焉如撤自聞之初有淚霑臆豈但渭陽情理難抑
言念軍國誰任其責每承 慈言常有憂色謂卿
勞瘁以早衰白今當變故過於悲憾何辭仰慰只

自焦迫幸有阿岐亦既通籍兄及弟矣並武如昔
嗚呼哀哉九京莫作綴文侑侑卿其有覺

卒判書朴宗慶大祥日致祭文 己卯

嗟卿發軔自予初服奮翼雲衢重擔硬脊用並文
武干城柱石既大其門職勞于國恩惟甥舅情視
手足朝著若虛天奪何速 慈心孔懷私以公憾
至今如疑予痛有盡日月不留大暮隔夕筵几將
撤典型永閔近侍侑侑其辭親屬悲哉不昧炯子
衷曲

卒判書朴宗輔周甲日致祭文 庚辰

嗚呼惟卿曰予渭陽昕夕服勤奉我 先王 先
王曰嘉小心慈良俾保予躬粵自嗶嗶食言步趨
逮嗣無疆周旋左右靡懈不遑一十八年式賴日
將柱石干城手足腎腸之勞之功何日可忘以降
之辰回薄星霜雖至今在下壽纔強胡不永年使
予悲傷入瞻 慈闈孔懷采長近侍替侑庶歆豆
觴

孝禧殿進香文 辛巳

嗚呼痛矣 慈聖之止慈而何忍棄小子耶小子
失 慈聖之眷愛而何恃何依耶庚申 天崩之

日小子纔十一歲耳幼穉孤弱瑩瑩含恤若不保朝夕而所庇賴依仰以長以成式至于今日休者皆我 慈聖之恩之德之賜也小子平日區區之祝惟願 慈壽無疆 慈候長寧永奉晨夕怡愉之樂庶幾以所未逮於我 寧考者承事我 慈聖少伸風樹之慟粗效春草之心誠孝淺微神理不佑乃於今日遽罹此罔極之憂苦天乎冤哉胡寧忍斯嗚呼痛矣父母之心孰不愛其子而慈愛之無窮又豈有如 慈聖之於小子者耶小子今已踰三十矣亦既有子而有女矣雖小子之不敏

亦可以自護其身矣 慈聖之視小子自起居飲食寒暑之節以至暫時之苛癢微細之嘔呻軫念之勤勤憂慮之憧憧殆若赤子之顧復孩提之保抱歲月愈深而勞動愈至欲報 慈恩昊天罔極而小子何所報焉嗚呼痛矣嗚呼配體 寧考元吉黃裳 慈聖之福履也覩天之妹如月之恒慈聖之儀容也貞靜徽柔言不出閫 慈聖之德性也孝友恭儉不自滿假 慈聖之篤行也樛木螽斯宮闈和平 慈聖之賊化也欲闡 慈德彤管莫殫而小子何所闡焉嗚呼痛矣 慈聖之恩

之德如彼其大且至小子既無所仰報無所仰聞而平日區區之祝又莫得而遂小子之孤負慚悚痛恨軫結者又當如何也嗚呼痛矣先陵堪輿之不叶慈聖之所積年隱痛于心也他日從祔之禮又慈聖平昔之至願也今幸遷奉議定吉地載卜不離園寢之側永奠佳城之宅將以同時同隧右奉寧考左祔慈聖天實誘衷地亦效靈千秋萬歲體魄永寧神理人情庶其無憾此或可以俯慰小子莫及之哀仰酬平昔結轡之慈心也耶嗚呼痛矣至情無飾至哀無文小

子何心忍告終天之訣耶此生此世慈顏不可以復覲慈音不可以復聞哀哀小子于何控訴扣曾投血穹壤茫茫而已嗚呼痛矣

顯思宮進香文

癸未

嗚呼慟矣慈宮之止慈而遂棄小子耶慈宮之盛德而不享遐齡耶天乎冤哉此曷故焉嗚呼小子不孝不吊年纔十一父王見背瑩瑩含恤穹壤茫茫承茲艱大孺子何知依而為命者惟慈恩是庇賴而成就者惟慈誨是迪長而壯而室家而子女肥甘適口矣一飯不時則慈膳已

廢輕煖適體矣一着或違則 慈寢莫安一風一
雨一寒一暑一動一靜一行一坐榮衛之和瘁藥
餌之可否罔一非 慈念之所憧憧而式至今身
有康彊之吉國有磐泰之安者皆我 慈宮之賜
也三年而免懷天下之為子者皆然而小子猶在
抱矣洗腆而喜慶天下之為母者皆然而 慈宮
猶悶斯矣止慈孰如我 慈宮盛德孰如我 慈
宮嗚呼慟矣劬勞之恩昊天罔極而小子無所報
焉柔嘉之則令聞不已而小子無所闡焉區區寸
心之日夜所祈祝者惟願 慈候之如罔如阜壽

善康寧享千乘之養而奉三朝之歡而已奈之何
忱誠淺薄神明不惠一朝无妄之祟遽貽終天之
痛天之降割胡寧忍斯嗚呼小子之無狀雖不足
以格天豈謂 慈心之眷愛愬然於小子如是也
耶 慈德之卓越而壽僅踰於中身理實難諶豈
謂小子之愆殃而禍延於 慈躬也耶小子皇皇
而莫之俯恤小子依依而莫之俯聆 音容永闕
幽顯遂隔天乎寃哉此曷故焉嗚呼慟矣小子之
初不離于裏歟練冠而居不揆於衷歟人莫不加
隆而小子何所隆焉人莫不自盡而小子何所盡

馬分之所定禮隨而正先王有制不敢壞也蓋小子之至慟猶勉於抑情就禮而彼儀節之細故盈庭之紛然視爾不減此實滕國之父兄百官不我足也小子之至慟於是焉愈結轡矣嗚呼慟矣日月云邁即遠期迫依攀 玄和亦無餘幾哀哀小子何恃為生養千乘於何地奉三朝於何處思之而腸摧言之而聲咽悠悠此世此何人斯天乎冤哉此曷故焉嗚呼慟矣至恫無辭至哀無文今茲之號非辭非文惟小子崩霄靡逮之情訴其萬一而已伏惟 明靈鑑乎否乎嗚呼慟矣嗚呼慟矣

和嬪致祭文

甲申

聖考初載望深螽斯再 命嘉選嬪膺吉期蟬聯其世淑靈其姿入宮之日上告丰儀 恩殊禮曠內職專司嬪居若驚謙虛自持 聖考曰嘉能贊敦齋 皇妣曰媿盆繅是宜和衷之德暨我先慈二南被化六宮同辭亦粵 獻敬以悅以咨是善事我屬屬怡怡予欲紀美以傳來茲嬪愈感頌服勤靡虧小子不吊冲歲嗣丕兩紀六慟穹壤餘悲屬尊惟嬪天復不遺誰與為依寧禁淚滋節惠為誅匪言我私靈惟鑑誠敬予薦卮

翼成公黃喜祀孫袂登科後致祭文 乙酉

天造邦家厥有良弼漢蕭唐房為卿之匹慮遠思深經紀黼黻四百年來彌誦功烈祀孫登龍乃在今日賸焉興感數行親綴安得起來奠我杌隍靈應不沫歆茲芬苾

麟坪大君 潛 遺稿添刊後致祭文

際昔 寧陵卿惟介弟夙著忠敬寔推仁厚遭時艱虞身不已有三滯瀋館九馳燕輶 聖祖嘉乃篤友靡替 恩言追盡質神無愧 列祖繼志殊渥屢侈 宸章斯煌有屹豐碑逮予嗣服未遑示

志遺稿添刊撫昔興懷矧當茲年事若不偶綴文
侔侑尚冀歆止

永溫翁主成服日遣內侍致祭文 己丑

嗚呼永溫汝真不淑生而善病如將難育肆予惟憂念汝愈篤惟其內蘊如璞貯王祥和之貌敦厚之質既豐厥初宜享終吉自免孩提少康于疾予乃有喜成就是祝年漸及笄爰錫湯沐中壺撫愛視若已出惟汝婉孌來輒繞膝始若有意又何奪速慟矣嬌姿居然就木聲容宛爾森于心目反顧爾室已成陳迹出殯于外生死永隔情至不文哀

反無哭奠此一竿近侍宣讀

孝明世子別奠親祭文 庚寅

維歲次庚寅七月丙辰朔十二日丁卯父國王舍
哀茹寃具酒食為文告訣于世子之靈曰嗚呼天
之奪爾何其速也將謂爾能事上帝而然耶將椽
喪我邦家而然耶抑不穀不仁不德獲戾神明酷
罰先及於胤嗣而然耶予將孰怨而孰尤曷因而
曷訴欲語則氣先結欲思則心先窒欲哭則聲先
咽天下古今亦或有有國家而如予情景者耶慟
矣慟矣自予目不見爾容耳不聞爾音已六閱旬

而兩易序矣爾之尚寐而無朝無昏冥冥漠漠耶
予之頑忍而食息自如悠悠泛泛耶爾果有知也
否乎予果方夢而非寤乎爾果儵然而逝乎爾將
蹶然而返乎父母妻子之恩在此 宗廟 社稷
之重在此城闕宮殿之處在此逝乎何徃徃與誰
親日居月諸其運常然年徃歲來其故常然穹高
壤厚其極常然返乎何期期誰與知天下之慟莫
大於違親爾之誠孝而不念三年之愛何若是忍
也天下之悲莫深於無子予之竒險而奄為四窮
之首何若是毒也慟矣慟矣予昔年纔踰十 皇

考見背艱大之業若山壓身身之孤子邦之机隍若不保朝夕而一年二年托於兆民之上者予何有焉特皇天 祖宗默佑之力耳自爾誕生予心之喜不止為為人父邦本固而 皇考 列聖之緒可賴而衍也爾又既冠既室亦既抱子仁孝聰明天質夙成遂攝予政八方延頸殷道可以復昌周命可以維新豈曰予一心之喜一身之慶殆亦天下國家罕有罕觀之事而予妄以無憂自信誰意一朝降割萬事瓦裂 宗祊之虞憂予躬之悲涼反有甚於 皇考見背爾身未生之日也耶慟

矣慟矣爾之清明秀美之姿吉善祥和之氣天之所以降之者不易而及其摧折也忽嬰之以危急之病又重之以乖雜之證如流斯坎如燼斯灰理之難諶胡遽莫淹豈所謂丕子之責于天者耶真乎假乎孰從而正神乎人乎孰主張是慟矣慟矣呱呱世孫將謂祖謂父乎惇惇予生將唯國為命乎爾倘有省聞予此言其必掩抑於幽明之際也今予之悲非惟爾是悲悲予之不仁不德積罪于躬不克保予佳兒使四百年 宗社凜凜如一髮而莫之如何也尚復何言尚復何言慟矣慟矣嗚

呼哀哉

卒領敦寧金祖淳成服日致祭文

壬辰

肺腑之親心膂之寄相須一體任之不貳豈予私卿先王有命導予寡昧罔不以正入告出順彌綸鎮安綏我邦國措之泰磐雖則天佑實亦卿恃迪予繼述昭揭義理三十年餘身佩安危卿非得已卿心孰知人豔福祿卿獨憂痲盡瘁至死是卿之謂前夕一面千古之訣大厦榱摧中流楫失疇倚疇毗予懷之悲辭短情溢瀉于茲卮

明溫公主成服日遣內侍致祭文

嗚呼慟矣汝今長逝此果真耶夢耶日聞汝疾病沈篤之報雖晝宵焦憂食息靡甘心竊以為汝弟之慘喪在前仁天庶幾悔禍則勿藥之喜尚有可望以是默祝而冥禱者凡幾日矣竟又捨予而長逝汝豈忍為此汝豈忍為此嗚呼慟哉嗚呼惜哉自汝病欲之後為其父母者寧不欲一見生時之面以慰死後之心而非但予荐經喪威心神飛越不忍見汝宛轉呻楚之狀實恐汝病中勞撓煩亂反妨於調治之節一日二日含意莫遂今焉生死永訣恨結幽明此果真耶夢耶萬事已矣慟如之

何旬月之內汝之兄弟相繼棄予凶禍之荐仍情理之冤酷求諸古今實罕其比欲語而聲先咽欲哭而淚不下以汝平日之誠孝苟若有知於冥冥之中無暇於自悲而將悲汝父母之老而無依伶仃孤苦之情言之至此衰腸如割天何忍斯天何忍斯尤有所切悲而至苦不能自己者以汝夙就之姿早偕佳耦琴鐘之好十年無替而竟不能育一子嗣遽至此境是豈汝薄福而然也乃予之積殃在躬天怒鬼猜復以餘禍及於汝身也思之至此慙恨彌中慟如之何慟如之何時日流邁奄已

就木宿昔之別遂成千古今雖欲見汝明慧端莊之相而不可得矣雖欲聞汝婉順愉和之聲而不可得矣嗚呼慟哉嗚呼惜哉欲使予忘汝乎則父子至情人之所不能廢也欲使予不忘汝乎則悠悠日月予懷之悲又無可已時矣餘生良苦慟如之何慟如之何殞殮之日始擬臨視又因大臣藥院之所懇請抑情勉從汝果能無缺然悲悵之念於冥漠不言之際乎否嗚呼慟哉嗚呼哀哉

明溫公主墓遣內侍致祭文

自汝云逝月已四屆我思誰譬汝恨疇解宅汝于

鐘城闕之趾延墓南望梧岡左峙湛汝真遊不念
我獨輦路東過封鬣未宿如將見汝羣珮肅鑾恍
惚夙昔柔聲怡顏聞無聞覩有淚如注泊焉何之
使我屢顧靈兮在此有知乎無瀝哀于觴俾奠載
酤

福温公主墓遣內侍致祭文

自汝背予炎涼已代懿行徽躅浸邈而晦倫理之
慟尚不堪耐况情所鍾父母專愛駕出東門傷悼
尤倍一麓左右藏汝姊妹眺矚所經指點之內胡
不歡迎銅縷琨珮和容愉色若平昔對疑近疑遠

心焉如痲凝望低回俾以奠酌歆我格我靈庶不
昧

列聖御製卷之八十

列聖御製卷之八十一

純宗大王

文

擬農政綸音

王若曰農者天下之大本也民以食為天民之農也男子荷耒耜而耕耘女子採桑葉而蠶績有穀盈倉有衣盈箱上事父母下育妻子天下無不飽之民無不煖之民然後入學校教以人倫父子有親君臣有義夫婦有別長幼有序朋友有信使無飽食煖衣則近禽獸之患入則孝於父母出則弟

於鄉黨人倫明於上小民親於下國家太平萬民咸寧千萬年無疆之慶其在農也

諭八道四都備陳民生救濟之道綸音己巳

王若曰傳曰民惟邦本本固邦寧民之於邦其本也重可知也其本也重而邦國賴以為安亦可知也是故自古聖帝明王莫不以民事孜孜於晝宵以愛民保民為祈天永命之本而亦觀治政得失之如何民也者王者之天也食也者民之天也國無民國不為國人無食人不為人若夫饑寒不離於身勞苦不休於時愁歎多聞於閭里徵斂日加

於蔀屋抱刻骨之弊而莫由得聞有不堪之苦而莫由得達為人君者雖欲愛民保民亦何得哉博施濟衆堯舜其猶病諸然恒念如保之意眷眷於愛民兢兢於保民故惠澤之自然流下無遠不遍無微不至者以其在於人君之誠也惻怛愛民之政哀痛責躬之詔日下於朝而不以誠則徒為空言民亦不以為信矣夙夜憧憧罔敢違寧一物之害於百姓一事之困於小民咸責於人君之過而戒慎恐懼之工實為愛民之本此則人主之所當自反處也至於窮山深谷有許多困弊之事而朝

廷漠然不知荒田僻野有不忍不堪之苦而廟堂
切絕切疑無得聞此固人主之過而在下者亦安得
辭其責哉得聞而施惠人主之政也舉弊而由達
守宰之職也昔者漢宣帝少在於民間通吏事而
知民苦故能為少康之治而惟予小子以不肖寡
躬生長深宮冲齡叨至艱之業而德澤無一流於
百姓政治愧於前代之君而惠化無一布於八方
夙宵恐懼凜凜若乎朽索之御六馬慄慄危乎臨
深履薄而不敢一時蹙弛民生之困苦日加一日
而予未能詳知而亦未能施惠守令之貪墨今加

昨年而予未能洞察而亦未能痛懲只使哀彼小
民受難測之害嗷嗷不能自保予既未同於漢宣
帝之事而百姓之疾苦無以自達於予則雖欲一
分思救民之道其何得哉粵在 英廟朝五紀治
平專在於愛百姓懲貪墨勤勤孜孜 聖德大功
史不勝書 先朝仁政無非出於愛民而 德化
膏澤遍施八方雖億兆之衆愚夫愚婦無一不蒙
被化澤抑亦予小子之仰觀者也又我 英廟令
守宰使之製進民隱詩其切於民弊者除之省之
亦我 先朝凡民之困苦者有達于 聖聰即命

除之省之而又嘗飭道伯守宰以書以策歷陳農
務民情九重深邃而萬民之苦樂不勞而得徹此
予小子所以每思仰法者也顧今三陽載新萬品
咸蘇而八方民生之憂患困苦正在於此時漢文
之方春之下詔二千石良吏之引見其亦可當於
此時茲爾京畿公忠咸鏡平安黃海全羅江原慶
尚道臣及夫四都留守使三百六十有二州之守
令以民生之困苦閭里之艱難備陳其由亦具救
濟之道以上道臣道臣收聚遍看拔其尤最善者
區別論理以聞至於四都留守親加裁定以聞使

小民之苦樂無一遺於予之親覽焉嗚呼今之此
舉非為觀瞻亦非一時文具之舉也咨爾八道道
伯另加申飭毋或近於塞責毋或近於例科必使
誠心對揚盡意備陳自此予亦可見守令之治與
不治誠與不誠而臧否黜陟由是可明言雖不中
亦無所失若不盡誠實為辜負並此知悉事令承
政院下諭于八道道臣四都留守

諭畿甸湖南湖西華城民人綸音

王若曰嗟爾京畿湖南湖西暨華城民人明聽予
一人誥惟予小子以否德寡昧叨承大位臨御九

載無一物視澤無一事視恩而惟爾等猶免顛連之苦者此何故也實是我祖宗德澤浹洽於民生者也是故皇天眷顧我東方九年之間稽事連登予當諸道年分之狀聞也每語于中曰以予不敏德昧前王誠未能上格天心而天之降福穰穰澤未能下感民情而民之愛戴眷眷豈非予小子所當慙惕自愧之事哉兩順風調此是難得之盛事而予心憂懼實無異於水旱為災之時奈之何自春徂夏雨意漠然杲杲日出圭壁屢舉於郊廟雨澤雖得於晚夏惟彼京畿湖湖南湖西華城靈

應終慳秌節已過年遂判歉夫今年旱災雖有各道之不同而蔽一言曰歉荒而至於稍登之海西近因雨水之災又無異於荒歲哀彼小民何以賴生嗚呼一夫不得其所古昔明辟猶嘗恥之况此幾萬生靈不免饑饉而流離乎由予否德致天之怒無辜之民其將盡劉自是以來夙夜恐懼食而忘其味寢而不成寐明燭達夜連日靜思民者國之本也國而無民何以為國食者民之命也民而無食何以為命昔我先朝甲寅歲歉民困不至於今日之尤急而如傷若保之政惻怛至懇恤民

大政洋溢於八域兆衆凡我海東戴天臣民孰不
感激欲報有不忘之思猗歟 大聖人為民 聖
念至矣盡矣今年本道將甚於甲寅苟利於民予
何所惜况又繼述之大者乎茲發內帑錢二萬兩
胡椒一千斗丹木五千斤湖南錢一萬兩胡椒四
百斗丹木二千斤湖西錢五千兩胡椒三百斗丹
木一千斤京畿錢三千兩胡椒二百斗丹木一千
斤華城錢二千兩胡椒一百斗丹木一千斤湖南
進上停退價米無論三等邑除留下送湖西進上
價米尤甚邑亦令除留下送爾等勿以否德為咎

勿以九重為遠各盡其心各盡其力無輕離鄉井
無胥動愁怨親戚隣里互相勉戒互相救助以安
其居有苦於身者言于守宰議于道臣道臣守宰
亦當殫心拯濟必不使爾等有顛壑之患爾等其
各信之以俟來歲之豐登上天至仁亦豈不貽我
來牟多稌多黍乎爾等明聽我心腹之誥因此思
之竊發之患多出於此時道伯知此意申飭營將
及列邑俾盡討捕之責無敢懈怠其心無敢侵害
平民朝家亦豈無別般廉察之道乎此亦荒年為
民之一道並須知之

歲首勸農綸音 庚午

王若曰農者天下之本也曰予聞之王命布農事
命田舍東郊善相丘陵阪險原隰土地所宜五穀
所殖以教道民國之所重於民民之所恃於農者
由斯而豈不大哉四時之序春為之首春而明農
乃亦有秋朝而徇鐸野而于耜我田既減農夫之
慶千箱萬箱嘉穀可食之物莫不畢具使民食之
而生也然後於國知親上服勞之道於家知事長
忠信之義是所謂天下之為本者農也本立然後
太平可議也嗚呼予小子嗣大曆服凜凜乎兢兢

乎未嘗敢弛於元元本本之方噫以九重之深察
兆民之衆而雖欲盡知其疾苦其勢難矣哀哉元
元其何以生非方伯守宰之字撫保卹其何以生
仰候天氣以審其時明諭州縣專意農功田野荒
廢思所以修之守宰怠慢思所以黜之善於治而
可用者陟之勤於公而可任者擢之一黜而人皆
幽焉一陟而人皆明焉視國事為家務者方伯之
任也躬行畎畝以率其力安集流亡專意農桑糧
乏者給之懶惰者警之一農不耕思民之有飢者
一女不織慮民之有寒者常念百里之分憂以答

列聖御製卷之八十一
國家之期望守宰之責也若反於此勸之者徒促其耕戒之者只督其穫門外惟有吏日來徵租更索錢鳴鼓而聚之擊木而召之男耕女織手足難當於此之時服勤畎何足以利用懋力耕耨何足以厚生春作秋成但為朝疲夕勞之端時和歲豐無異年凶歲荒之時雖欲仰育育疑父母而力不足又欲育妻子而終身飽奚暇為之哉此則大非予之所望於八道方伯四都守臣暨三百六十餘州之守宰者恭惟我列聖相承盛德至善洋溢八域戴髻垂白之類莫不被生成之澤猗歟盛

哉且年穀屢豐太史書大有於策黎民相慶賀於野小子叨位十馬其載星孛水火雷異之災無年不有逮至去年穡事尤為大歉幾萬生靈如在漏船之中一則否德二則否德予每對食則思民之飢而忘其味遇夜則思民之寒而忘其寢靜言以思我心忡忡又因湖邑守宰之疏本餓莩之狀顛連之患益聞其所不聞慘矣難言方春和時草木羣生皆有以自樂而惟我赤子纔經歉歲憂苦而不知方春之好愁歎而不如草木之樂予猶以自慰者其惟在於賑賙之盡心而已未知救死不贍

之民自當新春能無捐瘠之患而瓶罌之貯尚有可種之穀頽頽之餘尚有昏作之力乎予之所憂於民者雖在常年猶不能弛况歉荒之纒經所望於方伯守宰者當如何哉歲首勸農便成文具亦列朝已行之事也予豈敢曰近於文而不為行之哉今因綸音之中兼諭保恤之道能體此意而對揚使流民安于畎畝之間寡人亦無宵旰之憂即新春之所望也方伯守宰雖欲放忽其可得乎咨爾京畿湖西湖南海西關東關西北關嶺南華城沁都松都廣州道守臣以至列邑牧府郡縣守令

勉勉於勸農均賦之方益勵於奠安接濟之責而若不精白一心其罪何居並以此知悉事政院下諭八道四都

勵農務布禮義綸音

辛未

王若曰農者天下之大本也民無衣食其何以生然耕之家一而食之家十種之家一而衣之家十無食無衣少老亦無以依賴是故聖帝明王之所常懂懂而民之由此而生者豈不信哉孟子曰民之有道也飽食煖衣逸居而無教則近於禽獸事親敬長禮之大也睦隣親友禮之中也服事勞力

禮之末也知斯三義國寧民安苟究其由實是食
衣之裕而亦不可以專飽專煖而忽於三義者明
矣自從近年民之有忽於三義勿論偷牌犯官斷
鄉好訟之亂風誤俗比比有之言念及此實極寒
心矯滌掃革之道尤在農務之惓惓勉勵而禮義
之所以大布衆民之至愚至蠢者正當今日之急
務也咨爾諸道方伯留臣深體此意亟思惕念奉
行之意事喉院下諭于八道四都

諭被災各道及四都民人綸音

王若曰嗚呼皇天降災小子國家多虞民庶靡安

職究其由實在我躬噫小子之心直有一端懇懇
惻惻之為民一念而已爾等必知之矣而無奈百
虞溢目萬事叢脞者猶必誠有所不足也焉可以
一人之無過歸之於天耶此亦小子之咎也反以
思之况初有是過而受之天災者乎然則尤其是予
之咎也明矣予既以發微始言矣豈不布哉惟我
祖宗投艱遺大厥屢百年以來重熙累洽百穀豐
登衮躬無闕失之歎朝野無荒廢之業庶幾至于
予躬雖以守成言之恃國初創業之艱苦必不至
於流涕歎息之境而自小子叨位以來夙宵憂懼

而不以一事一政報答 先王之宏謨俯察臣下
之仰望者此是予之大咎也且百僚恬嬉小大因
循積年成憲不能奉守至於等夷滅亂名分掃地
此亦予不能躬率之致也此亦予之大咎也有一
於此國不能安持况兼此兩者乎是所謂萬語一
矣今日之上自大臣下至羣工尚有所依之望之
者惟在爾等之勿以饑饉動其心凶歉易其土相
慰奠居恭俟天命予雖不敏否德責躬痛悲思所
以保民之道則足可以保目前之急天必俯監小
誠自有感應之道咨爾衆民非海東之民歟亦非

被 列朝至德至化之民歟嗚呼后非民罔與守
邦民非后罔與仰戴予言不虛矣予言不虛矣茲
遣近侍之臣先宣此意咸須知悉道伯守臣以此
宣布列邑曉諭坊曲俾無一民不知之弊

諭五部民人綸音

王若曰惟天惟 祖宗至仁隆盛 聖德光烈閭
里無歎愁之聲百姓舉安堵之業四百年來基本
永鞏至斯太平其誰之恩歟小子不敏小子否德
今日亢旱孔甚且極靜言厥由嗚呼歎哉惟爾五
部等坊曲之民豈非仰哺於 列朝受澤於 聖

世之遺民也思此必知不可撓擾而使國家多艱也決矣予言及此猶若忘寡躬之所失責衆民之愚蚩矣雖然堯湯大聖也有洪水桑禱之憂事予既否德豈無致災之理茲以漢城判尹宣諭此意爾等各安其業小勿驚慮以慰予一分之心

諭臺閣綸音

王若曰臺閣耳目之官也國之治亂專係於此卿等勿以予不敏克體 列朝設始之意以答小子至懇至切之義予雖否德豈有待卿等虛言授之哉誠在寡躬事在卿等更勉欽哉更勉欽哉予言

不再予言不再申以法醞庸表敬義思我 朝四百餘年鞏基之業由達於一臺官之直諫也

諭關西道帥臣守令文武士民吏胥軍校綸

音

王若曰嗚呼咨爾關西之人明聽予哀痛之誥嗚呼皇天不吊我邦家維庚申之夏我 皇考正宗大王遺棄臣民藐予小子以冲幼之齡承艱大之遺今十有二年于茲矣予自惟涼德不克上畏天命下答民心夙宵耿耿憂懼恐或顛蹶我先大王畀付之重乃者嘉山土賊之變起而清北幾千

萬生靈入於塗炭魚肉之中是予之罪也凶年饑
歲竊發之患何代無之而嘯聚徒黨盜弄兵戈侵
破城邑戕殺命吏凶鋒鴟張中外騷然即黃巾綠
林之類也嗚呼風俗頹敗而予不能正之紀綱解
弛而予不能振之民生困瘁而予不能恤之貪官
墨吏縱橫恣肆而予不能察之無一政一事之可
以迓續天命允叶民心者書曰其爾萬邦有罪在
予一人嗚呼予豈敢自恕哉嗚呼彼賊魁之滅倫
敗常自干天誅予不敢赦若其隨從之徒黨大半
我赤子之訛誤者原其心寧欲隨凶魁犯大逆哉

特為飢寒所驅迫而凶魁脅之耳今聞道帥臣協
力勦捕期即掃平此雖不可已之事勦捕之際若
使無辜橫罹於鋒刃豈曰行天討而救民命乎其
抗逆官軍者固在勿論其自知訛誤脫身歸順者
齒之平民俾復其業其擒納賊黨自贖其罪者視
其輕重而另加賞給有能捕納賊魁者千金之賜
專城之職當所不惜予豈食言至於各處四民之
舍其井里奔走波盪之狀如在目中而最是飢民
之望哺者忽遭賊變填於溝壑者必不知幾千百
人唉我民斯何辜于天乃罹此凶念至於此但心

酸鼻咨爾方伯帥臣及守宰克體予哀痛之言一
邊奮發威武期於掃蕩一邊竭心賑賙期於拯活
毋俾予重獲戾於天命民心嗚呼關西一路人風
民俗素稱質厚而尚義慷慨磊落忠君向上之人
自古相望豈於今日獨無此人其各勉爾忠義交
相告諭各守乃業安堵如常毋以一時驚擾之故
遂謂國家置爾等相忘嗚呼爾西土之人爾無負
予而予則不克盡為君之責使爾等遭此板蕩驚
動之患予實負爾等予有何多誥茲遣兵曹參判
鄭晚錫為慰撫使往代予言咨爾道帥臣守令文

武士民吏胥軍校明聽予哀痛之言

諭關東民人綸音

壬申

王若曰予寡人不惠于德天降水旱比歲不登是
惟予一人之咎奚辜于爾萬姓去歲四道之灾極
備極無哀我黎庶命迫溝壑念茲恤焉錦王何安
噫彼關西以北小醜為盜肆搆戎亂流毒列郡王
師致討諒非獲已賴天之靈次第勦平而兩西失
業之民如在水火塗炭之中雖有別遣慰撫之舉
而至若東道亦有騷擾不寧之慮顛頷嗷喁如在
目前嗟乎關東瘠土也田野之廣人物之殷視他

道反不及焉杼柚既空流亡日續靡依靡托何以
為生方伯守宰其果能鎮安而接濟之發廩調飢
能體北闕之思于耜鋤畝勸趨西疇之事撫摩懷
綏克紓分憂之義殫誠救恤俾無捐瘠之歎乎茲
令近臣往宣予至意俾匹夫匹婦咸知予如傷若
保之心嗟爾大小民人恃而無憂咸奠厥居無依
者就賑有土者就耕永作我東土之民天佑下民
歟荒豈歲有哉

諭關北民人綸音

王若曰荒年饑歲吾民之顛顛顛連者實是王政

之在所拯濟而朝家之視民猶父母之視子也子
而望哺以予孔邇之心豈不能盡父母之責也逖
矣北路 王跡所基 仙寢所奉即我家豐沛之
鄉也自在我 列朝眷顧子惠之政靡不用其極
隆恩厚澤浹洽民心逮予嗣服以來惟 先志是
承是述夙宵一念常勤北顧而嗚呼皇天示警極
備為灾哀我民生阻飢滋甚遑遑若不保朝夕此
專由於朝家之懷綏未盡官吏之撫摩多失而言
念及此寢食靡甘矧今關西告警彼因飢思亂之
徒殆同潢池之弄兵王師致討是豈獲已親騎調

發適值大侵此又北民騷擾不寧之端也少忽調
救無異推納為方伯者能悉心措畫無負委寄之
責歟為守宰者能多方接濟克盡奠居之道歟茲
遣近臣宣予至意俾吾民各安其堵無一夫一婦
不獲之歎而永作我太平之民庸慰予九重宵旰
之念

諭六道道臣綸音

癸酉

王若曰嗚呼予寡人否德臨御已十有四年于茲
矣惠澤不能下究于民治化不能上格于天天降
之災連年荐荒咎實在予惟民奚辜蓋自己巳以

後極備極無無歲不災哀我黎民何以為生式至
今年始也旱澇之相仍終焉霜雹之為害百稼卒
瘁諸道同歎至於北路之關北關東之嶺西湖西
之內浦尤有甚焉瓶罌俱罄杼柚且空方秋阻飢
來春可知瘡痍溢目錦王靡安嗟彼庚癸之患何
以救之惟予乙丙之憂何以紓之噫予之視民如
赤子目今民情之遑急殆無異於匍匐入井矣其
所懷保之策撫綏之政一或失宜則烏在其為民
父母之道乎此予所以夙夜憧憧若恫在己者也
咨爾按道之臣果能悉心措劃克體予委寄之念

及聖德集卷之六十一
守土之臣亦能殫誠接濟各盡其奠安之方俾我
灾道飢邑顛連顛頷之民能免於填溝壑而散四
方一夫一婦皆獲其所歟被灾之尤甚者其令及
時賑貸其不甚者亦當量宜蠲停惟予灾民恃予
無動各奠厥居安其業而樂其生焉此綸音下諭
于咸鏡道江原道忠清道京畿道慶尚道全羅道
道臣處

歲首勸農綸音 辛卯

王若曰國依於民民依於農農用不成則民將無
以為命國將無以為賴此乃民之大本國之急務

莫先於農者也昨年年事雖不至於歉荒畿內之
民終年不得息肩兩西疲於勅行之迎送冠蓋之
相望三南多損反不如關東之瘠薄至於北路荐
饑之餘流亡者未復顛頷者未蘇而三甲又不熟
矣通計八域民力殆矣民食艱矣予雖深居九重
何敢一刻忘鄙屋之愁顧今歲律載新于耜屆期
不知彼困瘁之民能有種糧之蓄能具錢鏹之器
可以盡力於畎畝之事乎人力不給則天雖賜之
豐登其何以望梁茨京坻之慶乎咨我方伯居留
之臣飭勵近民之長吏曲察窮民之艱難不足者

補之不給者助之勤者勞之惰者董之四隣皆出
千耜齊舉耕播不愆耘耔及期則仁覆之天亦將
降康之不忒吾民可安而國隨以鞏固矣耿耿憧
憧之心與歲俱新茲用播告告爾農祥咨爾八道
四都方伯居留之臣毋視以每歲循常之飭爰及
長吏盡心對揚

諭畿甸湖西海西四都民人仍頒下帑儲綸

音 壬辰

王若曰嗚呼肆予否德叨承丕基臨御三十有餘
年之間無一可稱於懷保民生慰悅民志者而財

日益匱民日益窮駸駸然至於莫可收拾之境思
之及此寧不忸怩于中今年年事自春徂秋亢旱
為愆於播種之際巨浸卒瘁於穗穎之時加以風
雹蟲霜無灾不備畿湖海三道之農形遂判大無
民有何辜咎實在予當此隆冬之候哀彼失農失
業之民將何以絲身而穀腹得免於轉壑之患乎
莫曰九重深邃謂予不念於民情當錦衣之煖體
而思吾民無衣之苦遇王食之適口而思吾民無
食之艱一衣一食實不敢自安于心惕然怵然若
恫在己凡係救荒之政廟堂雖已講究區劃而此

及聖祖集卷之六十一
不過歎歲常典則其可曰盡吾之心乎苟利於民
尚何所惜茲又以內帑留儲京畿天銀一千兩丹
木二千斤白礬五百斤湖西天銀六百兩丹木一
千斤白礬三百斤海西天銀五百兩丹木一千斤
白礬三百斤四都天銀四百兩丹木八百斤白礬
二百斤特為頒下俾補賑資至若抄飢之漏濫饋
給之精否予當有入聞之道待畢賑以為賞罰之
地然為今日方伯守宰者苟能體予夙宵憧憧之
至意則必當殫竭於調救慰恤之節而大臣頃以
不堪任守令赴即罷送為奏諸道之尚此寥寥是

豈實心對揚之道乎亦令廟堂更加申飭期有實
效而惟我三道四都之民明聽予心腹之諭無輕
離鄉井無胥動怨咨黽勉相資各安其生則上天
至仁亦豈無嗣歲之望乎

歲首勸農綸音

癸巳

王若曰咨爾八道四都方伯守臣暨守宰民庶明
聽予誥嗚呼昨年民事尚何言哉惟予涼德未能
克享天心威罰之降不于予躬而反罹于爾無辜
三道告歉畿甸尤酷自秋徂冬殿屎相續若到春
窮其將盡劉予庸是懼寢食靡寧賑貸之議蠲蕩

之政雖以為靡不容極而其於幾萬生靈之殆同
勺水車薪何哉幸賴列邑諸人出義捐財得以彌
縫牽補紓目前之急在諸人誠足嘉尚在朝政實
非獲已苟使國有備豫豈容若是苟簡思之哀痛
言而忸怩噫國依於民民依於食食之本在農水
旱之灾雖係於天勤惰之別專在於人人若不服
田力穡以修人事而一遇灾眚輒委於天天心亦
豈肯底豫而降康畀之以穰穰之慶乎見今陽和
布德東作伊始而三路慘歉之餘饑凍濱死之民
將何以得免失農之患雖以少康之處言之疲於

轉輸困於徵歛市穀騰價公私俱匱流戶就食主
客並瘁農民事力之不能周瞻亦可以推知來秋
穡事之憧憧為慮有甚於目下遑汲為方伯守宰
者苟能殫誠勸課給糧以補不足借牛而助其力
點伍而修築澤陂巡野而墾闢荒蕪使之樂事趨
功不愆農時則舉將知勸庶幾有年民命之起死
為生亶在於是國計之轉危為安亦惟在於是今
日之悠悠萬事孰有大於是者乎茲將若恫之思
庸示敷心之諭勿視以常年例飭其各實心奉行
以副予宵旰之望

歲首勸農綸音 甲午

王若曰是日即月正元日也顧今艱虞溢目百度
解紐豈無可警可飭之事而予則曰課勸農功最
為目下急務蓋農者不可緩也無農則無食無食
則無民無食無民且將無國予小子夙宵憂遑恤
恤乎稼穡之孔艱憧憧乎雨暘之時若耿然一念
罔敢自安而旱澇為害仍歲告歉蕩析之苦顛連
之患將不能聊生惟彼赤子何嘗獲罪於天哉職
由涼德淺誠未能上格仁昊致此灾荒靜言以思
寧不慄然而悚赧然而愧哉再昨年三道被灾可

謂孔酷而至於昨秋失稔雖緣雨水之愆宜實由
人工之不逮苟能耕耨及時播種如期則庶或有
望於小康而奈之何纔經歉歲民無固志為字牧
者亦不能殫心董勵遂至於荐饑而亦惟曰非我
也歲也是何異於不食而望其自飽乎雖在屢豐
之餘興作之節固不可虛徐若於今年又復惰怠
失時則非直無秋必將盡劉豈不大可懼哉咨爾
八道四都方伯守臣暨列邑守宰之臣咸聽予言
各盡乃心先自于耜不奪不撓或省或助溝洫之
壅闕者疏而濬之蓄畬之陳廢者闢而易之以豫

以時克盡事功而凡民之貧而不能致力怠而不肯服勤者為守宰者調恤而導率之為守宰而或忽於勸相勞叙之方者考課黜陟有方伯存焉其各勉諸嗚呼願豐之心何歲不切而有民有國亶係於今秋之大有予言至此豈惟守土之臣惕然警省一心對揚亦惟我八路之民想有以知予至意予不多誥

列聖御製卷之八十一



